

Tjukurpa Jonah-nyatjara Jonah

Nyangatja Ngañmanytju Nyakula Wangkanytjaku

Nyangatja Godaku tjukurpa munu tjukurpa nyanga paluru utini Godanya aŋangu uwankaraku mukuringkunytja munu tjananya mukulyangku atunymaṛa kanyintja aŋangu Jew wiya tjuṭa kuļu. Panya Godalu aŋangu Jew tjutanguru wati Jonah-nya ngurkantanu ngura kutjupakutu ankunytjaku ini Ninipalakutu. Munu paluru palunya iyanu ankula ngura nyara palula aŋangu panya Jew wiya tjuṭa wangkara nguļutjunkunytjaku tjana kuranguru piiwiyingkula kura wantinytjaku.

Palu ngañmanytju Jonah-lu Godala kulilwiyangku wantingi munu paluru anu ngura kutjupakutu. Palu malangka tjintu maŋkurpa antipinaku tjuningka unngu ngarinytjatjanu paluru nintiringu munu Godalu palula wangkanyangka paluru wanganarangku kulinu Ninipalakutu ankunytjikitjangku. Kaya aŋangu Ninipanya ngurara tjutangku mulapaṭu kulira mulamularingu paluru tjukurpa Godalu wangkanytjitja tjanala tjakultjunkunyangka munuya kuntaringkula kura uwankara wantingu alatjiṭu.

Ka ngula mulapa Jesulu ngapartji aŋangu Israelkunu tjutangka tjukurpa wangkangi

munu panya Ninipanya ngurara tjuta tjanala tjakultjunangi. Alatji paluru wangkangi tjanala, “Tjintu Malatjangka anangu panya Ninipanya ngurara tjutangku nyuranya puntuwa wangkaku ngayuku tjukurpa kulira wantintjtjanguru. Panya paluru tjana Jonah-lu Godaku tjukurpa wangkanyangka wangañarangku kulinu munuya piiwiyarungkula kura tjuta wantingu. Palu kuwari nyanga kutjupa Jonah-la waintara pulka mulapa nyurala tjungu ngaranyi nyura nyakula wangañarangku kulintjaku. Palu nyura ngayunya ngurkantankunytja wiya alatjitu.” (Nyawa Luke-aku 11:32.)

Tjukurpa nyanganpa ngarinyi:

1:1-2 Godalu Jonah-nya altintjytja

1:3-16 Jonah-nya Godala tungunpungkunytja

1:17—2:10 Jonah-nya antipina pulkangka tjuni unngu nyinanytja

3:1-4 Jonah-nya wangañararingkula Ninipalakutu ankunytja

3:5-10 Ninipanya ngurara tjutangku piiwi-yaringkula Godanya kulintja

4:1-11 Jonah-nya mirpañarinytja munu Godanya ngalturingkunytja

Jonah-nya Godala Tungunpungkunytja

¹ Iriti mulapa wati ini Jonah-nya nyinangi, Amitaku katja. Munu paluru kulinu Godalu wangkanyangka nyanga alatji, ² “Jonah, pakara ara ngura tawunu ini Ninipalakutu. Ngura nyara palula panya anangu mungilyi mulapa nyinanyi. Kaña kuwari tjananya nyanganyi

kura pulka nyinanyi. Ka nyuntu tjanala ankula wirkara alatji wangka, ‘Nyuranya Godalu nyakula kuranmananyi munu nyuranya tjinguru iluntankuku.’ ”

3 Ka wati panya Jonah-lu Godalu wangkanyangka kulira wantira kampa kutjuparira anu ngura ini Tjapalakutu, Ninipalakutu ankunytja wiya. Palu ngura nyanga Tjapanya uru pulkangka itingka, ka pauta tjuta mulapa pitjala ngarala ankupai. Ka wati panya Jonah-lu wirkara nyangu pauta urungka ankunytjikitja ngaranyangka ngura ini Paintakutu, munu paluru tikiti payamilanu tatira ankunytjikitjangku. Munu tatinu wati pauta katipai tjutangka tjunguringkula Paintakutu ankunytjikitja, panya paluru kuliningi Godalanguru kumpira ankunytjikitjangku.

4-5 Munuya ma-pakara urungka rawa ankula ankula, ka Jonah-nya pakuringu munu pauta ungu ukalingkula ngarikatingu. Ka Godalu walpa pulka iyanu, ka winmu-winmulyarara pauta panya pulkara uritjinganingi, ka nguwanpa kałakatingi. Kaya wati pauta katipai tjuta pulkara nguluringkula kawaru-kawaruringu, munuya tjanampa god tjutangka tjpiningi tjananya atunymara walpa pilunmankunytjaku. Munuya pautanguru luuta tjuta urungka wañingi pauta tjarpanytjaku-tawara, tjana kułu ilunytjaku-tawara.

6 Ka wati pautaku mayatjangku Jonah-nya para-nguriningi, “Yaaltjingka paluru nyinanyi?”

Munu paluru ngurira nyangu, “Nyngatjam-pal kunkunaringu.” Munu wangkangu, “Jonah ngalya-pakala! Nyaakun kunkunpa ngarinyi? God nyuntumpangkalampa tjapila alpamilant-jaku walpa nyangatja wiyanjtjaku. Palurulampa tjinguru ngalturingkuku, munulanya wankaru kanyilku.”

⁷ Kaya pauta katipai tjutangku kaputu-kaputurira nyinara wangkara kulinigi, “Nyaangurulanya nyangatja pulka uritjingani. Wati kutjupa-manti kurampa nganañala tjunguringkula pitjangu, ka nyanga walpa pulka pitjangu.”

Munuya wangkangu, “Puṇu lalpirpa tjukutjuku tjutangkala wanyu ini uwankara walkatjura ngurkantankunytjikitjangku arkara.” Munuya walkatjunkula puṇu initjara tjuta pitingka tjungura tjunu. Ka wati kutjungku kuṛu patiringkula piti palulanguru puṇu kutju mantjinu munu kuṛu alaringkula nyangu ini Jonah-nya, munu tjanala nintira wangkangu, “Munta, wati nyangangkumpalanyal tatira ankula unnyunu.”

⁸⁻¹¹ Munuya Jonah-nya altira tjapinu, “Nyuntu wanyu ngura yaaltjiwanutja? Tjaā nyaa wangkapain?”

Ka Jonah-lu tjanala wangkangu, “Ngayuluṇa wati Israelnga ngurara wangka panya Iipuru. Munuṇa ngayulu Mayatja God Ilkaritjanya walkulpai, panya uru manta uwankara tjunkun-ytjanya.”

Kaya palunya piruku tjapinu, “Nyuntu wanyu nyaanu? Nyuntulanguru-manti walpa

nyangampa pulkaringu munu pauta nyangampa unṭura kaṭantananyi.”

Ka tjanala Jonah-lu ngapartji wangkangu, “Wiya, Godaluṇi Ninipalakutu wituningi, kana nyangatja Godala tungunpungkula nyuralawantu tatira pitjangu.”

Kaya paluru tjana Jonah-lu wangkanyangka kulira pulkara nguluringu. Munuya wangkangu, “Nyaakun nyuntumpa mayatjangka tungunpungkula anu? Utin wanganarangku kulira anama. Palu nyuntunyala kuvari nyaalku walpa atanarintjaku?” Alatjiya palunya tjapiningi panya walpa pulka mulararinyangka.

¹² Ka Jonah-lu wangkangu, “Nyurampa kuranguru wiya nyangatja, ngayulanguru. Kaniya urungka wanī, ka walpa uru mapalku atanariku.”

¹³⁻¹⁴ Palu tjana Jonah-nya wañiwyangku wantingu, munuya tjatu-tjatungku pauta panya puṇu wara tjuṭangka arkara ilanigi mantangka wirkankunytjikitjangku. Palu putuya ilanigi panya walpa pulka mulararinyangka. Ka uru panya pulkara alatjitu pirnyalarara pautangka tjarpangi. Kaya palulanguru Mayatja Godala pulkara tjapiningi wangkara, “Mayatja, ngalturiwalampa! Nyanga kuwarin walpa pulka iyanu wati nyanga Jonah-languru pauta uritjingara urungka tjarpatjunkunytjaku. Ka nganana wati nyanga palunya urungka wañinyangkampa wanyu walpa atanmanama nganana wankaringkunytjaku.” ¹⁵ Munuya tjapiṛa wiyaringkula Jonah-nya mantjira urungka wañingu, ka walpa uru mapalku

atanaringu. ¹⁶ Kaya atanarinyangka nyakula tjana Mayatja Godaku pulkara nguluringu. Munuya kuka pungkula tiliwakaṛa Godanya walkuntjikitjangku ungangi. Munu tjana kalkunu alatji wangkara, “Nyangangurula nyuntunya kutju kuliku Mayatja Godanya.”

¹⁷ Palu Jonah-nya ʉrungka tjarpala ilunytja wiya panya Godalu antipina pulka iyanu, ka antipinangku Jonah-nya kuultjanu munu tjintu maŋkurpa wanka kanyiningi tjuni unngu.

2

Jonah-lu Godala Pulkara Tjapintja

¹ Ka tjuni unnunguru Jonah-lu Godala ngañmanyaju tungunpungkunytjatjanungku piruku palunya kulinu munu alatji wangkangi palula, ²⁻⁹ “Mama, nyuntu panya walpa pulka iyanu ngayulu nyuntunya kulira wantinyangka, kañiya nyangantu palya ʉrungka wañingu. Kaña unngu mulapa kata wiyaringkula karalukatingi,

mununa puṭu pakara nguwanpa ilungi mulyangka uru tjarpanyaṅgka.

Munuñatju ngayulu kulinu, ‘Tjinguruṇitju ngayunya Godalu wantiku.’

Palu ngayuluṇa piruku kuliningi,

‘Wiya, Godaluṇi wanka kanyilku ngayulu palunya rawangku walkuntjaku.’

Palu ngayuluṇa wanka alatjitu karalukatira ukalingkula ngururpa puṭu ngaaly-manangi.

Munuṇa ukalingkula puli paṇṭangka
wirkanu,
kaṇi ukiri unngutjangku kata karpinu.

Kaṇatju nyakula kulinu, ‘Awari! Nyangatja ala
wiya pati alatjiṭu ngayulu małaku pakant-
jaku wiya.

Yaaltjingaraṇatju małaku pakalku?’

Mama God, ngayulu nguwanpa ilura pulkara
mirangu nyuntumpa ngayunya kuliṛa al-
pamilantjaku.

Ka nyuntu mulapatu ilkaringuru
kulira ngayunya wankaṛunu urungka
ilunytjaku-tawara.

Mama God, aṇangu tjarangkuya nyuntunya
wantira god puṇunguru palyantja tjuta
walkulpai.

Palu ngayuluṇa nyuntunya kutju rawangku
kulira mirawaniku nyanga tjana
purunypa wiyangku.

Munuṇa ngayulu nyuntunya kuka pungkula
tiliwakara ungkuku nyuntu ngayuku kaly-
paringkunytjaku.

Mama God, ngayuluṇa nyuntunya kuwari
kalkuntjatjanungku watarkuriwyangku
rawangku kulilkku.

Nyuntu kutjungku aṇangu tjukarurulpai ala
kurawanu nyinanyangka,

munun iwara tjukarurungka katirinkupai.”
Alatji Jonah-lu Godala wangkangi antipina tjuni
unngunguru.

¹⁰ Ka palulanguru Godalu antipina panya
palunya mantakutu wituṇu. Ka mulapatu

wirkara Jonah-nya mantangka ulkapatjunu pika wiya.

3

Jonah-nya Wanganararingkula Ninipalakutu Ankunytja

¹ Ka Godalu piruku Jonah-la wangkangu,
² “Pakara ara ngura Ninipalakutu ngura panya anangu mungilyitjarakutu. Munu tjukurpa panyatja tjanala wangka, panya ngañmanytjuña ngayulu nyuntula wangkangu.” ³ Ka paluru mulapa pakara anu ngura Ninipaku munu ankula wirkanu. Palu Ninipanya ngura city pulka mulapa, wali mungilyitjara. Panya wiluraranguru kakarañrakutu tjintu mañkurpa rawa ankula kutju ma-pakalku urilkutu.

⁴ Ka Jonah-nya ngura Ninipala tjarpala ankula ngururpa wirkara anangu tjutangka wangkangi Godalu wangkanytja alatji, “Tjintu 40-nguru kunyu Godalu nyuranya uwankara mulapa wiyalku anangu, kuka, wali uwankara, kutjupa malaringkula ngaranytjaku wiya.”

⁵ Ka anangu tjutangku Godaku tjukurpa kulira ngulu-nguluringkula Jonah-la wangkangu, “Munta-uwa, panya nganana kura mulapa Godanya kulilwiya nyinangi watarku alatjitu. Uti nganana mulamularingkula kampa kutjuparira Godanya kutju kulinma.” Munuya mała kutju kulira pulka mulapa tjiturutjitururingu kura panya ngañmanyapa nyinanytjatjanu. Munuya kunṭaringkula mai kuka ngalkuwiya nyinangi munuya mantara

wiru tjuṭa wantira mantara walyku-walyku tjana palyantjitjangka tjarpala nyinara wañingi tjituру-tjituру mulapa.*

⁶ Ka wati panya Ninipaku mayatjangku kulinu Jonah-ku wangka munu kulintjatjanu nguluringkula tjiyanguru pakara mantakutu ukalingu munu mantara wiru panya añaŋgitja arara wañira mantara walyku-walyku palyantjitjangka tjarpala nyinakatingu manta tjunpatjarangka pulkara kunṭaringkula.

⁷ Munu paluru wati tjuṭa witura iyanu añaŋgu tjuṭangka para-wangkanytjaku alatji, “Nyngatjala pitjangu Ninipaku mayatja tjuṭanguru nyurala wangkanytjikitja. Kaya wanganarangku kulira palyanma alatji kuka, mai, waina uwankara ngalkuwiyangku wantima munuya puluka, nanikuta, tjiipi kuļu ngalkuntjaku unguwiyangku wantima.

⁸⁻⁹ Munuya uwankara mantara walyku-walyku palyantjitjangka tjarpala nyinama, munuya kuka tjuṭa kuļu mantara kurakurangka tjarpatjura. Munuya kura nyinanytjatjanu kampa kutjuparira palyanyku nyinara Godala tjapinma nganampa ngalturingkula nganananya iluntankuwiyangku wantintjaku. Ka tjinguru Godalu kampa kutjuparira nganananya kalypangku wantiku, kala wanka nyinaku.” Nyanga alatjiya añaŋgu tjuṭangka para-tjakultjunangi panya wati mayatjangku wangkanytja.

* **3:5** Tjakangkuya ara nyangatja alatjinganingu kura nyinanytjatjanungku kunṭaringkula tjukarururingkunytjikitjangku.

¹⁰ Kaya aŋangu tjutangku wanganarangku kulir̄a nganmanyapa kura nyinanytjatjanu kampa kutjuparingu tjukaruru nyinanytjikitja. Ka Godalu tjananya nyakula kulir̄a ngalturingu munu tjananya iluntankuwiyangku wantingu.

4

Jonah-nya Mirpaŋarinytja Munu Godanya Ngalturingkunytja

¹ Ka palulanguru Jonah-nya tjituru-tjitururingu munu Godaku mirpaŋarira paluru wangkangu, ² “Nyaakun panyatja ngayunya iyanu ngura parari Ninipalakutu ankula aŋangu tjuta wangkanytjaku? Munun nyaaku tjananya mapalku iluntankuwiyangku wantingu? Utin tjananya kalyparingkuwiyangku iluntara wiyanma. Panya nyuntun ngayula nganmanytju wangkangu tjananya iluntankunytjikitjangku. Kaŋa ngayulu kulinu, ‘Wiya nyuntu tjinguru tjanampa ngalturingkuku.’ Ka panyaŋa alatji kulir̄a ngayulu tjanalakutu ankunytja wiya wantira kampa kutjuparira anu ngura panya Paintakutu ankunytjikitja. God, ngayulu nyuntumpa ninti panya nyuntu aŋangu tjutaku mukulya, munun warpungkula mirpaŋaripai wiya, ngaltunytju mulapa. Nyuntu kutjupara aŋangu tjuta iluntankunytjikitjangku kulilpai munun tjana kampa kutjuparinyangka iluntankuwiyangku ngalturingkula wantipai. Mulapa nyuntu kurunpa ngaltunytju.”

³ Munu palulanguru Jonah-lu wangkangu, “Mayatja God, nyuntu ngayuku wangka kulintja wiya. Ngayunyanji palya iluntara.”

⁴ Ka Mayatja Godalu Jonah-nya ngapartji kulira wangkangu, “Wiya, nyaakun mirpañarinyi? Wantimal!”

⁵ Ka Jonah-nya pakara anu kakarara parari wiya urilta nyinanytjikitja Ninipala itingka. Munu paluru wiltja kurakura palyara patara nyinangi munu kuliningi, “Tjinguru Godalu iluntankuku anangu tjuṭa, tjinguru tjananya wantir’iyalku.”

⁶ Ka Jonah-ku ngurangka Mayatja Godalu puṇu puya pakaltjinganu Jonah-nya wiltjangka pukulpa nyinanytjaku. Ka puṇu puya paluru mapalku pulkaringu pulkuṇpa wiru mulapa. Ka Jonah-nya wiltjangka pukulpa mulapa nyinangi. ⁷ Ka mungawinki Godalu maku kataṭi purunypa iyanu puṇu panya palunya ngalkula kurara wiyanjtaku. ⁸ Munu tjintu pakan-nyangka Godalu walpa waru iyanu, ka Jonah-nya kulingku kampangu wiltja wiyangka. Ka paluru nyinara puṭu warikitja ngarangi munu nguwanpa punkaningi. Munu paluru wiltja wiyangka ilunytjikitja mukuringangi, munu Godala wangkangu, “Palyani iluntara wanka kany-ilwiyangku.”

⁹ Ka Godalu wangkangu Jonah-nya, “Nyaakun mirpañarinyi puṇunguru?”

Ka Jonah-lu ngapartji wangkangu, “Wiya, palyana ngayulu mirpañarinyi ilunytjikitja.”

¹⁰⁻¹¹ Ka Godalu Jonah-nya piṛuku wangkangu, “Puṇu nyangatja munga kutju pakaṇu munu

mungawinki piltiringu rawa ngaranytja wiya. Ka nyaaku nyuntu tjituru-tjituru nyinanyi? Nyuntun wanyu minangka kurpira puṇu nyangatja pakaltjinganu? Wiya palatja ngayulu tjunkunytya. Palu nyuntun puṇu wanka rawa ngaranytja-tjiratja ngalytjurmananyi. Wiya palatja puṇu piltiringu, anangu wiya. Kan nyaaku anangu tjuṭaku ngalturingkuwiya puṇuku nyinara ulanyi? Kulila, ngura pala Ninipala anangu tjuṭa mulapa nyinanyi nampa nyangatja 120,000 munu puluka, tjiipi kuļu pulka ngaranyi. Utina ngayulu anangu Ninipanya ngurara tjuṭaku ngalturingama tjananya wirura kanyintjikitja, panya paluru tjana kuwari ngayunya kulilpairingu.” Alatji Godalu Jonah-la wangkangu.

**Tjukurpa Palya
Portions of the Holy Bible in the Pitjantjatjara
language of Australia**

copyright © 2019 Bible Society of Australia

Language: Pitjantjatjara

Translation by: The Pitjantjatjara Bible Translation Project, Wycliffe Bible Translators and Bible Society Australia.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

PDF generated using Haiola and XeLaTeX on 11 Nov 2022 from source files dated 22 Nov 2019

b29b7786-0954-5b75-82cb-3657182b63d6